



BUROYA KURDÎ ya Pêwendî û Agahdariyê

Bultena agahdariyê N° 66 - Çirî 2010

Quai aux Pierres de Taille (Arduinkaai) 11, 1000 Bruxelles - Tél. 02 219 80 60 www.kurdishbureau.be
kurdishbureau@scarlet.be

XEBATA BUROYA KURDÎ

ÎLON 2010

KONFÊRANS

19.09.2010 : *Mîr û Balêrîna Kurd, Leyla Bedir Xan (1908 – 1986)*



Rênas Newrozî, nivîskar û rojnamevan, bi alîkariya gelek fotoyên arşîvan, li ser balêrîna kurd, Leyla Bedir Xan, peyivî.

Leyla Bedir Xan yekemîn jin, ji Kurdistan û Rojhilata Navîn, bû ku di warê balê (ballet, sema) di salên 1930-1960 navdar bû. Ew ji malbata mîrî ya navdar a Bedir Xan û keça Abdulrezzaq bû û di 1908 de li Istanbulê çêbû. Dema ku di 1913 de, Imperatoriya Osmanî biryar da ku endamên malbata wê biperçiqîne, ew piçûk bû û neçar (mecbûr) bû ku tevî diya xwe ya polonî, Henriette, biçe Misrê. Piştî şerrê cihanê yê yekemîn, ew çû Ewropa. Wê li Swîsra xwend, piştî dibistana balê (ballet) li Almaniya kutah kir (qedand) û li dawiyê li

Fransa jiya. Wê li ser dikkên (sahne, scènes) ewropî, li Otrîş (Nêmsa, Avusturya), Almanya, Swîsra, Fransa, Beljîka, Ispanya, Hollanda û Îtalya lîzt. Û Wê gelek caran li Amerîka û Kanada jî lîzt. Her hergav bi serbilindî xwe weka balêrîneke (semaker) kurd dida nasîn.



Ji piçûkayiya xwe de, Leyla gelek di bin kartêkirina (te'sîr) bavê xwe, ku Kurdê tenê ku li mala wî piano hebû, de ma. Û ew ronakbîreke mezzin jî bû. Wê lêgerîn li ser merasîmên ola zerdeştî – ola kevna a Kurdan – û yê olên din ên kevn ên îranî, misrî û hindî kirin. Û wê lêgerîn li ser dîlanên Rojhilata Navîn jî kirin. Wê li Parîsê di 1986 de wefat kir. Navê wê di dîroka Kurdistanê û arşîvên cihanê de hatiye nivîsîn.

HEVKARÎ BI RÊXISTINÊN DIN RE

Hevpeyvîn

10.09.2010 : Rebecca Thys, xwendekareke doktora li beşa civakzanîyê (sociologie) li zanîngeha U.L.B. (Université Libre de Bruxelles), hevpeyvînsek bi Pervîn Cemîl, seroka Buroya Kurdî, re di çarçeva lêgerîna xwe li ser rêxistinên “volontaires : ên ku bê amanceke maddî kar dikin) li Bruksêlê, kir.

11.09.2010 : Rojnama tirkî Taraf bi Pervîn Cemîl re hevpeyvînsek li ser rêfêranduma li ser destûra nuh li Tirkîyê, ku roja din bû, kir.

Seredana birehber a Parlemeta Bruksêlê

27.09.2010 : Koordinasyona Minderhedenforum (Forum Hindikayîyan) seredaneke birehber a Parlemeta Bruksêlê pêk anî. Kurd jî beşdar bûn vê seredana gelek balkêş. Rehberê jin komplêksbûna sazandeyan, li Beljîka û Bruksêlê, ravekir û piştî mêvan li eywanên cihê yên bedew gerrandin.



BEŞDARBÛNA XEBATÊN RÊXISTINÊN DIN

Semînerek li Parlemeta Ewropî

15.09.2010 : Koma Keskan/ ALE (Hevalbendiya Azad a Ewropî) û rêxistina « Kurdish Human Rights Project », ku li Ingilterê ye, li Parlemeta Ewropî semînerêk bi navê « Situation for Displaced Persons in the Kurdish Regions » (Rewşa Kesên Cîhil « koçber » li Navçeyên Kurdî) kir.

NÛÇE JI KURDISTANÊ

ÎLON 2010

KURDISTANA TIRKIYÊ

RAPPORTA « UN »Ê LI SER TIRKIYÊ

Di 13 Tebax 2010 de, pispora amerîkî ya Rojhilata Navîn, Carol Migdalovitz, rapporek li ser Tirkîyê, bi navê « Türkiye : Siyaseta Nasname û Desthilatê », ji bo serwîsa lêgerînê ya UNê (Rêxistina Neteweyên Yekbûyî), nivîsî. Ew tê de dibêje ku partiya desthilatdar, AKP, di bicîanîna rêformên sozdayî yên li ser bêtir maf ji hindikayîyan re û « vebûna kurdî » de bi ser ne ket. Ev rapor çend hefte berê rêfêranduma li ser destûra nuh a tirkî, ya 12 Îlon 2010, hat nivîsîn.

(rudaw.net, 07.09.2010)

BOYKOTKIRINA RÊFÊRANDUMA LI SER DESTÛRA NUH

Di 12 Îlon 2010 de, 30 sal piştî darba leşkerî ya 12 Îlon 1980, rêfêrandumek li ser destûreke nuh a tirkî hat kirin. Wê 58% belê û 42% na stendin. Li tevayîya Tirkîyê, rêjeya (nisbet) beşdarbûnê gihajt 77%. Lê, li Kurdistanê ew 58% bû û ji vê rêjeyê 42% got na.

Partiya ku bi awakî ne fermî kurdî ye û ku nêzîkî PKKê ye, BDPê, kampanyake xurt ji bo boykotkirinê ajot, ji bo ku di pêşniyara vê destûrê de mafên Kurdan ne hati bûn nivîsîn, li gel guherandinên girîng di warê dîmokrasiyê li Tirkîyê de.

(çapemeniya tirkî û kurdî, 12.09.2010)

SEREDANA “ENCUMENA PÎRAN” YA EWROPÎ

Di 15 Îlon 2010 de, ji bo dîtina çareyeke aşîtiyane ji pîrsa kurdî re, “Encumena Pîran” a ewropî çû seredana Tirkîyê. Serokatiya wê Martti Ahtissari, serokê berê yê Finlanda (ji 1994 heta 2000) û Xelata Nobelê ya Aşîtiyê di 2008 de, kir. Pê re wezîrê berê yê ispanî yê karên derve, Merceino Oreja Aquirre; wezîrê berê yê hollandî yê karên derve, Hans Van Den Broek, û rappornivîsê encumena Tirkîyê, Albert Rohan, pê re bûn.

Şande çû seredana serok Abdullah Gül, serokwezîr Recep Tayyip Erdoğan û berpirsiyarên partiya kurdî BDPê û yên civaka sîvîl.

(netkurd.com, 16.09.2010; aknews.com, 18.09.2010; rizqari.org, 20.09.2010)

CARDIN PÊTROL LI KURDISTANÊ

Li gora şirketa pêtrolê ya tirkî, TPAO, pêtroleke baş di bîreke ku kûrayiya wê 700 m. ye, li Ergenî, nêzîkî Diyarbekirê, hat dîtin.

(avestakurd.net, 23.09.2010)

NAVÊN KURDÎ LI 91 GUNDAN Û LI SERVÎSÊN DIYARBEKIRÊ

Encumena şaredariyê (meclisa belediyê) ya bajarê Diyarbekirê navên kurdî yên eslî yên 91 gundên wî li ser navên tirkî ku li ser tabloyan hatine nivîsîn zêde kirin. Ev navên kurdî berê 70 salan hati bûn tirk kirin. Biryara li ser vê guherandinê ji aliyê encumenê di Çirî 2009 de hati bû stendin.

(avestakurd.net, 23.09.2010)

Bi ser de jî, şaredariya Surê, yek ji şaredariyên Diyarbekirê, li ber hemî servîsên xwe tabloyên bi sê zimanan, tirkî, kurdî û inglîzî, bi dar ve kirin (daleqandin).

(netkurd.com, rizqari.org, 28.09.2010)

BOMBEKIRINA KURDISTANA IRAQÊ

Di 26 Îlon 2010 de, firokeyên tirkî navçeyên sînorî yên Kurdistanê Iraqê bombe kirin. Rûniştvanekî fille yê gundê Başê, qezayê Dêrelûkê, birîndar bû.

(peyamner.com, 27.09.2010)

WEZÎRÊ TIRK Ê HUNDIR LI KURDISTANA IRAQÊ

Di Îlon 2010 de, wezîrê tirk ê hundir, Beşir Atalay, çû Kurdistanê Iraqê û tê de rastî serokê Kurdistanê, Mesûd Berzanî, û berpirsiyarên ramyariyê (siyasî) yên din hat. Amanca seredana wî ew bû ku tecrube bike ku çareyekê ji şerrê PKKê û pîrsa kurdî li Tirkîyê re bibîne. Ev rast-

hatin beşek ji rasthatinên ku Tirkîye bi berpirsiyarên amerîkî û iraqî re dewam dike ne.

(azady.nl, anf.net, Ekurd.net, 28.09.2010)

10 SAL ZÎNDAN JI SEROKÊ “BDP”ê RE

Di 28 Îlon 2010 de, dadgeheke tirkî hevserokê partiya ku bi awakî ne fermî kurdî ye, BDPê, Selahettin Demirtaş, bi 10 sal zîndan tawanbar (mehkûm) kir, ji bo ku wî di 2007 de li têlêvîzyona kurdî “Roj TV” peyivî bû û tê de “propaganda rêxistinekê” kiri bû.

(avestakurd.net, peyamner.com, 28.09.2010 ; Hürriyet.Milliyet, 29.09.2010)

ZIMANÊ EREBÎ DI PERWERDÊ DE

Wezareta tirkî ya pererdê biryar stend ku zimanê erebî deyne ser zimanên ne tirkî ku meriv dikare di bernamêyên perwerdê de bibijêre. Zimanên din ên biyanî ev in : Çînî, almanî, fransî, inglîzî, ispanî, îtalî, japonî û rûsî. Lê eger em werin kurdî, ew ji nêzîkî 20 milyon Kurdên ku li Tirkîyê dijîn re qedexe ye !

(avestakurd.net, 30.09.2010)

32 BERPIRSIYARÊN KURD TÊN RAGIRTIN

Di 30 Îlon 2010 de, polisê tirkî li Riha (Urfa) 32 endamên partiya kurdî « BDP »ê, ku ji wan hevserokên şaxa Riha ya vê partiyê, Adil Fidan û Ibrahim Ayhan, ragirtin. Bi ser de jî, ew ket mala şaredarê vî bajarê, Ethem Şahin, û ew bir. Û ew ket buroyên rojnama kurdî Azadiya Welat a Yekîtiya Xwendekarên Dêmkokrat, ya zanîngeha Riha, jî. Ew hemî bi propaganda PKKê hatine tawanbar kirin. PKKê biryara dirêjkirina agirbirrînê meheke din stend.

(rudaw.net, anf.net, 01.10.2010)

KURDISTANA IRAQÊ

WEZÎRÊ URDUNÎ YÊ PÎŞESAZIYÊ LI KURDISTANÊ

Di 31 Tebax 2010 de, wezîrê urdunî yê pîşesaziyê (sina'et), Amer El-Hedîdî, çû Kurdistanê Iraqê û tê de di zimanên cihê de rastî serok Mesûd Berzanî û serokwezîr Behrem Salih hat, ji bo ku li ser pêşdebirina pêwendiyên bazarganiyê û aborî di navbera her du alîyan de giftûbêj (munaqeşe) bike.

(peyamner.com, krg.org, 02.09.2010)

CÎGIRÊ SEROKÊ AMERÎKA LI KURDISTANÊ

Di 01 Îlon 2010 de, serok Berzanî pêşwaziya cîgirê serokê amerîkî, Josef Biden, kir. Şandeke kurdî û yeke amerîkî beşdar bûn vê rasthatina ku tê de li ser rewşa ramyariyê (siyasî) li Iraqê hat giftûbêj kirin (ji hîlbijartinên parlamenterî yên Adar 2010 de hukûmetêke iraqî nîn e !). Mîrza Biden ji Mîrza Berzanî re dilniya (te'kîd) kir ku serokê amerîkî Barak Obama gelek girîngî dide rola wî li Iraqê.



(krg.org, peyamner.com, pukmedia.com, aknews.com, rudaw.net, nefel.com, kurdistan-news.net, 02.09.2010)

ÊRÎŞ LI NAVÇEYÊN EREBKIRÎ YÊN KURDISTANÊ

Di 01 Îlon 2010 de, bombeyek li Qiziltepê, qezayekî Xaneqînê, teqiya. Du berpirsiyarên Yekîti Nîştîmanî Kurdistan (YNK) birîndar bûn.

(pukmedia.com, 01.09.2010)

Di 16 Îlon de, du bombe li ser pageriyeke (dewriye) polîs li Kerkûkê teqiya. 3 polîs birîndar bûn.

(peyamner.com, 16.09.2010)

Di 24 Îlon de, bombeyek li qezayê Hewîca teqiya. 5 kes birîndar bûn.

(peyamner.com, 25.09.2010)

CIVÎN BI KONSULÊN WELATÊN BIYANÎ RE

Di 16 Îlon 2010 de, hukûmeta Kurdistanê Iraqê civîneke fireh bi hemî konsul û nimînendeyên welatên biyanî, ku li Kurdistanê hatine nas kirin, kir. Piştî giftûbêjkirina rewşa aborî û ewlehiyê (emnî) li navçê, her nimînendeyek li ser xebata xwe peyivî.

(peyamner.com, 16.09.2010)

KURD JI HOLLANDA VEDIGERIN KURDISTANÊ

Di rasthatineke bi berpirsiyarê pêwendiyên derve yê hukûmeta Herêma Kurdistanê Iraqê, Fellah Mustafa, re, balyozê (sefir) Hollanda li Iraqê, Peter van Leon, dilxweşiya xwe ji istikrara vê navçê daxuyand û got ku jimareke mezzin ji Kurdên Hollanda vegeyriyaye Kurdistanê. Her du alî girîngiya xurtkirina pêwendiyên xwe yê aborî û bazarganiyê û pêwendiyên di navbera zanîngehên xwe de dest nîşan da.

(azady.nl, aknews.com, 17.09.2010)

HEFTEYA ÇANDÎ YA SURYANÎ

Di 17 Îlon 2010 de, birêvebirê qezayê fille ya Eyn Kawa, Fehmî Metê Solaqa, pêşangeheke hunera teşkîlî “expressionniste”, karîkatûr, destnivîsa (calligraphie) suryanî û fotoyan, li eywana kluba cuhanên Eyn Kawa, vekir. Ev yek bi hinceta hefteya 3mîn a çandî ya suryanî, ku ji aliyê birêvebiriya giştî ya çand û hunerên suryanî hat pêk anîn. Jimareke girîng ji berpirsiyarên fermî (resmî) û hukûmî beşdarî wê bûn.

(peyamner.com, 18.09.2010)

HÎNKIRINA ZIMANÊ ALMANÎ

Di 26 Îlon 2010 de, protokolek li ser projeya hînkirina zimanê almanî li Kurdistanê Iraqê ji aliyê wezîrê çandê yê Kurdistanê, Sefîn Dizeyî, û konsulê alman li Hewlêrê, Steven Pantel, hat wajo (imza) kirin. 3.700 xwendekar xwest ku bîr qeyd kirin. Di 2010 de, dibistana pêşîn a almanî li Kurdistanê hat vekirin.

(krg.org, netkurd.com, 25.09.2010)

ÊRÎŞEKE XWEKUJ LI SULEYMANIYÊ

Di 29 Îlon 2010 de, êrîşeke xwekuj du karbidestên hêzên ewlehiyê li Suleymaniyê birîndar kirin. Berê ku têrorîst xwe biteqîne, polîs tecrube kir ku pê bigire, lê wî agir berda, du polîs birîndar kirin û piştî xwe teqand.

(pukmedia.com, peyamner.com, avestakurd.net, 29.09.2010)

KONSULÊ ALMAN LI HALABCA

Di 29 Îlon 2010 de, konsulê alman li Kurdistanê, Steven Pantel, çû seredana bajarê piçûk ê Halabca, ku di 1988 de bi çekên şîmîk hati bû êrîş kirin û tê de 5.000 kes bi fetisandinê miri bûn. Wî seredana peykerê (monument) şehîdan kir û îtîraf kir ku hin şirketên almanî çekên şîmîk ji Saddam Huseyn re firoti bûn.

(pukmedia.com, rudaw.net, 29.09.2010)

KURDISTANA ÎRANÊ

NIVÎSKAREK TÊ RAGIRTIN

Di 07 Îlon 2010 de, li gora malpera «renesansnews», hêzên ewlehiyê yê îranî helbestvan û nivîskarê kurd ê navdar, Azîz Nasirî, ji bajarê Merîwanê, bin çav kir û bir çiyekî nenas. Sedemên ragirtina wî ne naskirî ne.

(avestakurd.net, 08.09.2010)

5 RAMYAR (SIYASÎ) TÊN RAGIRTIN

Di 13 Îlon 2010 de, li gora malpera «hrana», hêzên ewlehiyê 5 çalakvanên kurd, Ayet û Salih Kerîmî, Ekber Xulamî, Sabir Muhammed û Wehîd Rahmanî, li gundê Binçê, ku girêdayî bajarê Rewanserê, li Kurdistanê Îranê, ragirtin û ew birin çiyekî nenas. Li gora vê

malperê, ew bi alîkariya partiyeke kurdî hatine tawanbar (ittiham) kirin.

(avestakurd.net, 15.09.2010)

CUHANEK LI BIN ÊŞKENCÊ DIMIRE

Di Îlon 2010 de, kurdekî cuhan, Nasir Îsazade, ku tevî du keçan ji aliyê hêzên ewlehiyê hati bû bin çav kirin, li bin êşkencê mir.

Li gora malpera «renesans.info», Îsazade ji gundê Kozereşê, ku girêdayî bajarê Selamsê, li Kurdistanê Îranê, bû, lê ku ji bo demekê çû bû Tehranê. Haya tukesî ji her du keçan nîn e.

Li gora rêxistinên mafên mirov, di demên dawîn de, kuştinên cuhanên kurd ji sedemên nenas zêde bûne. Ev yek ji tirsê serhildaneke kurdî.

avestakurd.net, 20.09.2010)

ÊRÎŞEK LI MAHABADÊ : 11 MIRÎ Û 58 BIRÎN-DAR

Di 22 Îlon 2010 de, li Mahabadê teqînên mezzin li dijî hêzên ewlehiyê yên îranî bû. 11 kes mirin û 58 jî birîndar bûn.

Parêzgarê (walî) vî bajarî, Wahîd Celalzade, ji malpera fermî ya îranî « irna » re daxuyand ku ev teqîn di dema merasîma bîranîna şerrê iraqî-îranî de bû. Û wî got jî ku piraniya qurbanan jin û zarok bûn.

Partiya kurdî ku şerrê çekdarî dike û ku nêzîkî PKKê ye, PJAK, ev êrîş riswa (protêso) kir û got ku wê ew ne kiriye. PJAK êrîşeke din jî, ku berê rojekê li Saqizê bû û ku tê de du kes mirin, riswa kir.

peyamner.com, avestakurd.net, azady.nl, 22.09.2010)

HUNDERMENDEK TÊ TAWANBAR KIRIN

Di 22 Îlon 2010 de, li gora malpera „hrana“, dadgeha Merîwanê hundermendê kurd, Muxtar Hûşmend, bi 16 sal zîndan tawanbar kir. Ew di Sibat 2010 de ji aliyê hêzên ewlehiyê yên vî bajarî hati bû ragirtin.

Huşmend wênekêş (ressam), çalakvanekî (xebatkar) çandî, berpirsiyarê hunermendên Merîwanê û berpirsiyarê fêstivala hunerî ya salane ye.

avestakurd.net, 23.09.2010)

BOMBEKIRINA KURDISTANA IRAQÊ

Di 24 Îlon 2010 de, topxaneyê îranî navçeyên sînorî yên Kurdistanê Iraqê, Kîleşîn, Kegewzîn, Şmêrg, Mêrgemîr, Quncir, Bêrkme, Xnêre, Rusor, Serê Avê, Çiyayê Dême, Serî Kanî Dilk, Mêrgê Hewş û Lolanê, li nêzîkî bajarokê Sîdekanê, bombe kirin. Tukes ne mir.

avestakurd.net, 25.09.2010; peyamner.com, 26.09.2010)

DU KURD TÊN TAWANBAR KIRIN

Ajansa îranî ya mafên mirov, HRANA, daxuyand ku du Kurd, Cemal Emînî û Muhammed Munîrî, bi du sal zîndan hatin tawanbar kirin. Parêzerê (avukat) wan, Seyid Wefa Huseynî, got ku ê pêşîn bi propaganda li dijî rejîma îslamî ya Îranê, û yê duyemîn bi alîkariya partiyên ramyariyê (siyasî) ku li dijî Komara Îslamî ne, hatiye tawanbar kirin. Her du girtî berê du salan hati bûn zîndan kirin û piştê, bi dayîna pere, hati bûn azad kirin.

peyamner.com, 28.09.2010)

ÇALAKVANEK TÊ TAWANBAR KIRIN

Li gora malpera “kurdperspektiv”, Kurdekî 34 salî, Xerîb Fatimî, ji bajarê Merîwanê, bi 10 sal zîndan hat tawanbar kirin. Ew berê 9 mehan hati bû ragirtin û bin çav kirin. Ew bi alîkariya partiyeke ramyariyê ya kurdî hatiye tawanbar kirin û parêzerê wî nîn e.

avestakurd.net, 30.09.2010)

KURDISTANA SÛRIYÊ

KURDEK TÊ RAGIRTIN

Di 27 Tebax 2010 de, servîsên ewlehiyê yên sûrî Imad Iskan Ahmed, zewicî û bavê 6 zarokan, li Qamişlî ragirt. Sedemên ragirtina wî nenas in.

kurdwatch.org, 01.09.2010)

MIRIYEK LI ZÎNDANÊ

Di 28 Tebax 2010 de, Riyad Ahmed Xelîl di dema binçavkirinê de, li birêvebiriya ewlehiya ramyariyê (emnê siyasî) ya Helebê, mir. Ne xuya ye ku mirina wî xwezayî (tabîî) yan ji sedema êşkencê ye. Xelîl û kurrê wî Damhat bi hev re di 4 Tîrmeh 2010 de hati bûn ragirtin. Ev yek ji sedema kurrekî din, Ehmed Xelîl, şervanekî kevn ê PKKê. Evê dawîn di dema vegera xwe Sûriyê bi dilxwazî xwe radeştî (teslîmî) desthilatên sûrî kiri bû. Ji wê gavê de ew li zîndanê ye, lê birayê wî Damhat piştî mirina bavê xwe hat berdan.

kurdwatch.org, 18.09.2010; avestakurd.net, 22.09.2010)

4 KURD TÊN RAGIRTIN

Di 15 Tebax 2010 de, servîsên ewlehiyê yên dewletê yên Qamişlî 4 Kurd, Dr. Luqman İbrahim Huseyn, Sa'd Ferhan El-Hesen, Abdulxefûr Huseyn Huseyn û Salah Seîd Şêxmûs, ragirtin. Ev yek ji bo ku ew xulekek (deqqe) bêdeng, ji bo riswakirina (protêso) Biryarnama N° 49 li ser mafên Kurdan, rawestiya bûn.

Ev çalakiya xuleka bêdengiyê di 10 Îlon de li Amudê, ji aliyê Encumena Ramariyê ya Kurdî li Sûriyê hati bû dest pê kirin.

kurdwatch.org, 21.09.2010)

DU KURD TÊN RAGIRTIN

Di 21 Îlon 2010 de, li gora rêxistinên mafên mirov, du Kurdên Qamişlî, Cemal İbrahim Mencê û Mesûd Başûk, hatin ragirtin. Ê yekemîn ji berê jî çend caran, ji sedema riswakirina biryarnama N° 49, hati bûn ragirtin. Ê duyemîn li Almanya dimîne û ji bo seredanê hati bû.

avestakurd.net, 24.09.2010)

NŪÇEYÊN ÇANDÎ YÊN KURDÎ

PÊŞANGEHEK LI WANÊ

Di 01 Îlon 2010 de, bi hinceta Roja Navneteweyî ya Aştîyê, wênekêşê (ressam) kurd, Hasan Bağdaş, pêşangehek li Saraya Çandê, li Wanê, li Kurdistanê Tirkîyê, vekir. Ev yek bi amadebûna şaredarê Wanê, Bekir Kaya; serokê Odeya Pîşesazî (sina'et) û Bazarganiyê ya Wanê (VASTO), Zahir Kandaşoğlu; şaredara Bostancı, Nezahat Ergüneş, û endamên encumenên şaredariyê û hezkirên hunerê.

Hunermend Hasan Bağdaş ji 1973 de li Ostralya dijî. Heta nuha wî 32 pêşangehan li Ostralya û 26 li Çîn, Berlîn, Hamburg, Bruksel, London, Kayserî (Tirkîye), Diyarbakir, Ankara, Riha (Urfa), Istanbul û Konya (Tirkîye) vekirine.

aknews.com, 01.09.2010)

GOLA WANÊ JI 400.000 SALAN E

Mamosteyê zanîngeha Bonê û koordînorê projeya « Sondage » ya gola Wanê (Kurdistanê Tirkîyê), Dr. Thomas Litt, dawuyand ku ev gol ji 400.000 salan heye.

Projeya « Paleo-Van » ku di 2004 de li gola Wanê dest pê kiri bû û ku piştigiriya wê « Bernama Navneteweyî ya Sondajên Zanyariyê » (International Program of Scientific Sondages) kiri bû kutah (xelas) bû. Kar li ciyên cihê yê golê ji aliyê 35 zanayên navçeyî û navneteweyî hatin kirin. Piştî, wan civînek li zanîngeha Yüzüncü Yıl, li Wanê, kir. Prof. Litt tê de got ku gola Wanê ciyekî wê ya taybetî li cihanê heye û ku ew piştî volkanekê li çiyayê Nemrûdê derket. Û wî got jî ku encamên ku yane (équipe) di dirêjahiya 5 salan de civandin ewê di laboratwaran de bîn tehlîl kirin, piştî ewê ji ramana tevane (opinion publique) re bîn daxuyandin (ilan kirin).

nefel.com, 02.09.2010)

DÎLANÊN KURDÎ LI FINLANDA

Di 02 Îlon 2010 de, li gora malpera « kurdistan.kurd », rêxistina pirçandî ya navçeya Olenda, li Finlanda, civînek li bajarê Mari Hamen, bi amadebûna seroka Finlanda, pêk anî. Jin û zilamên kurd tê de sê dîlanên kurdî pêşkêş kirin. Serok û zilamê wê jî bi wan re ketin dîlanê. Kanala têlêvîzyona TV 24 ew bi awakî fireh weşand.

Divê ku bê zanîn ku Finlanda welatekî fêdêral e û ku gelek Kurd, ji 4 perçên Kurdistanê, nemaze ji Kurdistanê Îranê, li parêzgeha (wilayet) Olana dijîn.

aknews.com, 04.09.2010)

YANEYEKE KURDÎ YA FUTBOLÊ LI IRAQÊ YEKEMÎN E



Di 04 Îlon 2010 de, lîga iraqî ya futbolê maçek li stadîuma Bexdadê pêk anî. Yaneya (équipe) bajarê Duhokê, li Kurdistanê Iraqê, bi 1-0 bi ser ket. Lîzvan Xalid Muşîr kûpa vê lîgê stend.

aknews.com, avestakurd.net, 05.09.2010)

5 ALPÎNÎST LI ÇIYAYÊ AGIRÎ



5 alpînîstên (çiyahilkêş) Fêdêrasyona Alpînîstên Kurdistanê (Iraq), ku ji wan 3 zilam û 2 jin, hilkişîyan Çiyayê Agirî, li Kurdistanê Tirkîyê, ku bilidbûna wî 5.865 m. ye, û li serê wî ala kurdî çikand. Ev kom di 18.05.2010 de çû bû Kurdistanê Tirkîyê û di 10.08.2010 de vegeriya bû Hewlêrê.

Ev fêdêrasyon ji 2005 de heye û 150 endamên wê, ku ji wan 30 jin, hene. Heta nuha, ew hilkişîyane çiyayên cihê, li perçeyên cihê yê Kurdistanê.

nefel.com, 05.09.2010)

HELBESTA KURDÎ TÊ WERGERANDIN EREBÎ
Navenda Neteweyî ya Wergerandinê li Qahirê, li Mîsrê, berhevokeke helbestavanê navdar, Şêrko Bêkes, ji Kurdistanê Iraqê, weşand. Mezintirîn beşa vê wergerandinê ji aliyê Kurdekî, Azad Berzencî, hat kirin. (aknews.com, pukmedia.com, 07.09.2010)

XELATEK JI FÎLMEKE KURDÎ RE LI NEW YORKÊ

Di 13 Îlon 2010 de, filma belgeyî ya filmçêkerê kurd, Bülent Gündüz, ku jiyana dengbêjê navdar Evdalê Zeynikê dibêje, Xelata Juriyê li Fêstivala Navneteweyî ya Filma Serbixwe ya New Yorkê "New York International Independent Film" stand. (avestakurd.net, 14.09.2010)

FÎLMEKE KURDÎ LI SWÎSTA Û KANADA

Di Îlon 2010 de, filma « Mandû » (Westiyayî), ya filmçêkerê kurd ê Îranê, Ibrahîm Seîdî, du caran li Fêstivala Navneteweyî ya Fîlmê ya Torono, li Kanada, hat nîşan dan. Fîlm koçberiya kurdî dibêje û 90 xulek (deqge) dajo (dewam dike).

Cara pêşîn, ew di 09 Îlon de, bi taybetî ji bo rojnamevan û nûçegihanan (reporters) li eywana Citybankê hat nîşan dan. Cara duyemîn, ew ji bo xelk bi giştî, li eywana "AMC 5" hat nîşan dan. Berê jî ew li Swîsra, roja pêşîn a Fêstivala Navneteweyî ya Fîlmê ya Locarno, ku ji 4 heta 14 Îlon ajot, hat nîşan dan. (aknews.com, 17.09.2010)

JAPONIYEK LÊGERÎN LI SER KURDAN DIKE

Saichi Takahachi, 28 salî, xwendekarekî japonî li zanîngeha Hosei, li Tokyo, ye. Ji bo amadekirina doktora xwe di civakzanîyê (sociologie) de, wî seredana Navenda Ewropî ya Lêgerînên Kurdî li Berlînê kir, ji bo ku tê de têza xwe li ser Kurdên Almanya bike. Ew dibêje ku li Japon pirtûkên li ser Kurdan hene, lê ku lêger û rojnamevanên japonî bitenê piştî şerrê Iraqê di 2003 de bala xwe da Kurdan.

Seroka vê navenda kurdî li Berlînê, Eva Savelsberg, got ku komeke lêgerên japonî seredana vê navendê kiriye û ku tê de pirtûkên bi japonî hene.

Nêzîkî milyonek Kurd li Almanya û 200 li Japon dijîn. (rudaw.net, 19.09.2010)

BÎRANÎNA FÎLOZOFÊKÎ KURD LI BEXDADÊ

Di 20 Îlon 2010 de, Kurdish Publishing House (Mala Weşana Kurdî) li Bexdadê merasîmeke bîranîna fîlozof û nivîskarê kurd ê navdar, Mesûd Muhammed, pêk anî.

Birêvebira pêwendiyên derve ya vê navendê, Faiza Reşîd, daxuyand ku Mesûd Muhammed yek ji mezintirîn fîlozofên Iraqê bû û ku pirtûkên wî li pirtûkxaneyên iraqî û kurdî hene.

Muhammed di 1919 de li Koyê, li Başûrê Hewlêrê, bû bû. Wî huqûq li zanîngeha Bexdadê xwend, piştre, di 1960 de, dest bi nivîsina di rojnameyên vî bajarî de kir. Di 2001 de wefat kir. Ji berhemên wî, Zimanê Kurdî, Mirov û Hawîrdora wî, Gazinên Jiyanê, Perestroika Gorbachov, Rexneyek, Dîtinek li ser Şirovekirina (tefsîr) Mirovî ya Dîrokê. (aknews.com, 21.09.2010)

KONFÊRANSA JINÊN KURD LI KURDISTANA IRAQÊ

Di 18 û 19 Îlon 2010 de, li Duhokê, li Kurdistanê Iraqê, konfêranseke jinên kurd ku ji çar perçên Kurdistanê, ji Ewropa û Amerîka hati bûn bû. Ji wan, Leyla Zana, parlementera berê li Tirkîyê û Xelata Zakharov ya Parlemanta Ewropî; Nermîn Osman, wezîra hawîrdorê ya hukûmeta Kurdistanê Iraqê; Kajal Rahmanî, ji zanîngeha Harvardê, li Amerîka.

Du rojan jin li ser pirsên jinan û Kurdan bi giştî giftûbêj kir. Wan got ku ji bo alîkariya aşîtiyeke hergavî (daimî) li Kurdistanê ji destê wan çî bê ewê bikin. (rudaw.net, 21.09.2010)

5 PARLEMENTERÊN KURD LI SWÊDÊ



Li hilbijartinên parlementerî li Swêdê, di Îlon 2010 de, 5 Kurd, ku ji wan 3 jin, ji her çar perçeyên Kurdistanê, hatin hilbijartin :

- Partiya sosyal-dêmkar : 2 jin, Roza Güçlü Hedin (Kurdistanê Tirkîyê) û Şadiye Haydarî (Kurdistanê Îranê).
- Partiya Keskan : Cebbar Emîn (Kurdistanê Iraqê).
- Partiya Gel : Ismaîl Kamil (Kurdistanê Sûriyê)
- Partiya Çep : jinek, Emîne Kakabaweh (Kurdistanê Îranê)

Hukûmeta Kurdistanê Iraqê ji wan re peyamên (mesaj) pîroziyê şandin. (çapemeniya kurdî, 23.09.2010)

KURDEK EREBEYEKE KU BI AVÊ DIÇE ÇÊKIR

Berê deh salan, Mustafa Karasüngür, Kurdekî Tirkîyê, erebeyeke ku bi saya avê dixebite çêkiri bû. Wî li ser wê „H20“ nivîsî. Du dêpoyên wê hene, yek a gazê « LPG » û yek a avê. Ew wê bi avê 40% dajo. Karasüngür, 45 salî, ji 30 salan de bi êlêktronîkê xerîk (mijûl) e.

avestakurd.net, 26.09.2010)

450 ROJNAME Û KOVAR LI KURDISTANA IRAQÊ

Di 25 Îlon 2010 de, birêvebirê sendîka rojnamevanên Kurdistanê Iraqê, Yûsif Qesab, daxuyand ku nêzîkî 450 rojname û kovar li Kurdistanê tê weşandin. Û wî got jî ku hin ji wan ên partiyên ramyariyê ne û hin jî serbixwe ne.

avestakurd.net, 26.09.2010)

GOLIKÊ ZÊRÎN JI FÎLMÇÊKEREKE KURD RE LI HOLLANDA

Di 27 Îlon 2010 de, rêjîssora kurd, Berî Şalmaşî, û hev-rêjîssora hollandî, Sanne Vogel, Xelata Golikê Zêrîn « Gouden Kalf » li Fêstivala Hollandî ya Fîlmê, ji bo fîlma xwe « Mama », stend. Ewê xelat ji wan re di 01

Çirî de, di Galaya Fîlma Hollandî de, li şanoya « Stadschouwburg »ê, li Utrechtê, bê dayîn.

rudaw.net, azady.nl, 28.09.2010)

GOLA NEMRÛDÊ JI NAV 25 CIYÊN TÛRÎSTÎK ÊN EWROPÎ

Yekîtiya Ewropî gola ku li kratêra çiyayê Nemrûdê, li Kurdistanê Tirkîyê, ye xist nav 25 ciyên tûrîstîk ên ewropî. Ev kratêr ê mezzintirîn li Ewropa û 2mîn li cihanê ye. Tûrîst dikarin tê de avjeniyê bikin û di hewzên piçûk ên nêzîkî golê de bi ava têrmîk xwe bişon.

rizgari.org, 29.09.2010)

ŞANDEYA GOOGLE Û YOUTUBE LI KURDISTANA IRAQÊ

Di 27 Îlon 2010 de, akadêmiya têknolojiya enformatîkê ya hukûmeta Kurdistanê Iraqê pêşwaziya şandeke Google û Youtubê kir.

Amanca seredanê xurtkirina bikaranîna entêrnêtê li Kurdistanê ye. Ev akadêmî di 2007 ava bû bû.

netkurd.com, 28.09.2010)

BRUSSELS HOOFDSTEDERLIJK GEWEST
VLAAMSE GEMEENSCHAPSCOMMISSIE



Ev bulten, bi alîkariya Vlaamse Gemeenschapscommissie (VGC), bi kurdî, fransî, hollandî û inglîzî hatiye weşandin.